

17 SEP 2002

Mahathir-Pembangkang

MAHATHIR: PEMBANGKANG SALAH TAFSIR ISLAM UNTUK DAPAT PENGARUH

SHAH ALAM, 17 Sept (Bernama) -- Parti pembangkang menyalah tafsirkan agama Islam untuk mendapat pengaruh kerana sedar mereka tidak akan mendapat sokongan daripada ajaran Islam yang sebenar, kata Datuk Seri Dr Mahathir Mohamad.

"Mereka tidak dapat memenangi sokongan kalau diasaskan pada ajaran yang sebenar. Oleh kerana itu mereka mula salah tafsir agama supaya orang akan terpengaruh terutama mereka yang mungkin tidak begitu faham dengan ajaran Islam yang sebenar," kata Perdana Menteri ketika menjawab soalan pada sesi dialog selepas beliau merasmikan seminar kebangsaan bertajuk Memahami Malaysia Sebagai Sebuah Negara Islam, di sini hari ini.

Katanya Islam tidak sekali-kali menyeru umatnya memusuhi orang Islam yang lain tetapi ini dilakukan oleh pihak pembangkang untuk tujuan politik mereka.

Katanya, ketika Malaysia diperintah oleh British, orang Melayu tidak berpecah, sebaliknya mereka berpegang kepada Islam mengikut ajaran yang sebenar.

"Guru-guru mengajar agama Islam tanpa ada mirip kepada politik tetapi apabila kita menjadi negara demokratik dan kita percaya bahawa rakyat tentulah akan memilih orang yang terbaik untuk mewakili mereka, maka muncullah golongan ini yang nampak peluang untuk mendapat sesuatu bagi diri mereka," katanya.

"Dan mereka telah memilih untuk menggunakan, memperalatkan agama Islam sebagai daya penarik untuk mereka merebut tempat sebagai wakil rakyat, ahli yang berhormat dan sebagainya," kata Dr Mahathir.

Katanya pembangkang sedar jika mereka menggunakan Islam berdasarkan ajaran yang sebenar, mereka tidak dapat memecahkan orang Islam dan oleh itu mereka tidak boleh menang dalam pilihan raya.

"Parti pembangkang memutar belitkan Islam sehinggakan benda yang tak baik diutamakan," katanya.

Dr Mahathir berkata jika umat Islam berpegang kepada ajaran yang sebenar, mereka akan menjadi bangsa yang kuat, terpelajar serta mampu mencipta peralatan peperangan dan pertahanan.

"Tetapi malangnya apabila ada orang Islam hendak majukan negara Islam maka datanglah orang seperti ini dengan cara mencarutnya, memaki hamun, melempar fitnah, semuanya bertentangan dengan ajaran Islam untuk menghalang orang Islam mencapai kemajuan.

"Kerana ini, tiada negara Islam yang maju dalam dunia sekarang," katanya.

"Kalau kita balik kepada ajaran Islam yang satu dan berpegang kepada ajaran Islam yang fundamental, tiada perpecahan antara kita," katanya.

Beliau berkata adalah tanggungjawab kerajaan untuk menerangkan kepada mereka yang telah tertipu oleh pembangkang ini supaya kembali kepada jemaah Islam yang sebenar.

Katanya apabila orang Barat mengatakan bahawa Malaysia adalah sebuah negara yang sederhana, beliau menerangkan kepada mereka bahawa Malaysia sebenarnya negara Islam yang berpegang kepada ajaran Islam yang fundamental.

"Berpegang kepada ajaran Islam yang fundamental kita tetap menjadi satu bangsa yang baik, satu bangsa yang bersatu padu, satu bangsa terpelajar, satu bangsa yang mampu mempertahankan umat Islam di negara-negara lain," kata Perdana Menteri.

-- BERNAMA

RIZ SR AZH MAI